

肇慶府志卷五

建置

城池礮臺附

肇慶府

宋皇祐中儂智高反始築子城僅容解宇政和癸巳郡守鄭敦義乃築塼城周八百七十一丈高二丈厚一丈開四門東曰宋崇西曰鎮西南曰端溪北曰朝天明洪武元年江西行省郎中黃本初來掌府事請加修築改宋崇曰正東門鎮西曰景星門其後千戶郭純以城南隅濱江用石甃河畔高二丈與城址並捍水患景泰間西賊犯關天順間知府黃瑜濬池植柵周城之外柵外護以刺竹柵內環以敵樓工畢而寇適至莫能犯成化元年城上增置串樓八百一十間自是防守不患風雨三年冬建披雲樓於城上西北隅四年建南門

樓五年建東西二門樓及四隅角樓皆三層重簷疊拱又欲
拓北城至靜明寺會水災不果後叅將楊廣建北門樓十一
年知府李璡以披雲樓近濠增築塼城七十餘丈厚一丈高
並舊城改四門額東曰慶雲西曰景星南曰南薰北曰朝天
正德六年知府程杲重修串樓歲久而敝嘉靖七年兵備僉
事李香與知府鄭璋撤串樓修雉堞三十九年風雨連旬城
東北隅傾陷兵備僉事皇甫渙知府徐鷁修築崇正二年城
西門樓圯知府陸鏊修復十四年督府張鏡心知縣蕭琦發
帑築高三尺五寸改築四門月城舊制止有垣牆無馬路至
是改築之高厚與城並馬路廣濶亦如之吳志國朝順治八
年總兵許爾顯知府張之璧增城上礮臺六座礮房二十七
間窩舖一百四十八間水城礮臺二所東西各自河畔城垣

至水次東長十二丈西長十四丈五尺並高一丈二尺厚八尺撤麗城之屋相去四丈增葺樓堞康熙六年東北隅及披雲樓圯知府楊萬春閔子奇相繼修復康熙十一年知府史樹駿修乾隆三年八年俱題准部覆動帑修葺十九年知府吳繩年修嘉慶十二年肇羅道竇國華知府慶德張純賢修四門樓道光三年總督阮元奏於南門外重建礮臺二所並修垣墉樓櫓知縣韓際飛董之

高要志

明楊子春重修石城記洪武元年夏四月征南大將軍榮祿大夫中書平章政事兼太子同知詹事院廖永忠征南副將軍中奉大夫浙江行省叅知政事朱亮祖奉命南征攻取廣東西城邑之未下者由海道入南粵兵甲精銳令行禁止列城望風欵服沿海豪民違令者誅來歸者宥威振廣西皆遣使請命兵不留行百粵悉服乃遴選守令以撫安元元以前江西省郎中黃君本初忠厚廉敏達於從政委攝肇慶府黃君下車卽布令修政百廢具興加以惠愛曾未期月吏民爲之改觀君謂肇慶乃古端郡控扼海道藩屏上流地居衝要依律稟命於省請修城郭具器械嚴守備且言瀕海之寇不

時竊發當有以待之平章公深以爲然旣得請按行郡城廣袤四里三十步有奇舊制設敵樓三十五所近皆頽廢城東南角及西南崩圯者八十餘丈行者不便君念端民重困之餘日不暇給乃勸率民之好義者第其產之厚薄力之多寡戶滿三十者同一役或二十者共一工磚石木植灰瓦之用皆官給之選吏督其事城之圯者築石爲基累磚以甃其隙鱗次櫛比端方周正度城五丈餘建樓四楹爲間二百有一十復因舊址重建敵樓三十五經制之費民無預焉經始於今年之孟秋落成於秋之季月閱九旬而訖工樓櫓戰格煥然一新睥睨女牆百堵斯立黃君可謂知先務矣雖然民保於城城保於德古有是言矣是以忠信之長慈愛之師撫民以仁摩民以義導之以禮樂養之以德惠齊之以刑政斯民親其親長其長一旦事出非常率吾尊君親上之民以守之此地利人和之說也端之人咸謂城守重事也不可以不書請予文以刻諸石使觀風者有考焉公名德明字本初河中人僑居穗石是役也贊其事者經歷王智督工者前部事趙元帥府判徐寶童知縣戴允恭主簿蔣穀真縣尉阮良典史梁宗德與有勞焉洪武元年九月九日丙午

池南臨大江西南隅至東南隅三面濬濠周四百五十八丈

廣二丈八尺

云深一丈濶十丈俱誤

自西門外遶而北至

東門外謂之外濠長四百五十八丈深一丈濶十丈西門內

小水通竇過南門街至清軍館後

今清軍館兌為民居

謂之上濠復通

竇過塘基頭街下注謂之下濠下濠又通竇出城接外濠而

達於江自西門石嘴引江水而入者謂之西濠乃官船避風

之所

此數濠自明天順間知府黃瑜修濬深闊各有尺寸歲久漸為民居兩傍侵削西城上濠日漸淤塞其內外濠

塘佃銀遞年在府輸納

古澳在東門外通大江可以藏舟楫避風濤後

為潮沙所壅宋乾道六年郡守曹總修復設澳田若干畝歲

收為淘浚資今田廢而澳亦湮自東門水步頭起至天寧寺

前上接內濠水達江乃其故址亦謂之外濠先是城東外街

原在城脚明知府夏應台改出濠邊至北門止城西北外街亦

在城脚知府夏應台改出濠邊至披雲樓後新基及北門止

城北外濠舊從西門外遶披雲樓後轉東明萬曆三十七年

知府陳濂以府治龍脉自西來命工築塞培脉分北河為兩

截城北內濠原有監軍道左渠消水日久民作鋪其上淤塞
三十八年知府江中楠拆鋪修濬崇正二年知府張明熙復
濬之國朝順治四年總鎮羅成耀重濬外濠自東門水步
頭起直循而北復折而西直抵西門水步通廣一丈五尺深
一丈周九百七十二丈八年總鎮許爾顯令離城一丈重挑
濠塹廣八尺深六尺東西及北三面遶城康熙七年督府周
有德重濬內濠由塘基頭張衙巷通竇出城接外濠而注於

江

吳志

宋曹總修澳田記郡帶江流舟楫所道厲風時作白浪如山
淪沒者相屬也城東古澳以避風濤其來尚矣歲久弗治壅
爲平陸前守秦君始命濬之未再期潮沙日積艤舟則膠君
拯人於未溺信仁矣然歲必役民以修吾懼其難繼也因念
得田數十畝以給役事則民不告勞居無何郡人杜高以田
訟質於有司閱其辭弗決者累年予卽據律以折之高喜且
感義入其半以永修澳先是浮屠有市畝田以育妻子者因
籍之並以光孝寺僧典領歲度其入餽工以修自是舟涉吾

境無墊溺之患里民無竭作之擾一舉而兩利始願適矣秦君實推輪於前子敢不成之近時仕者事必已出若前人善否未始深究一切更之而後已予謂政有弗善浹日而更猶竊遲之事苟宜爲必相與維持庶乎可以行遠來者毋違斯言毋壞前規其活人也何既乎

礮臺二座在南門東西月城道光三年總督阮檄高要知縣

韓際飛修建

採訪冊

高要縣

城池

附郭

四會縣

舊無城明洪武二十四年肇慶指揮馮復始立木柵爲城天順三年西寇流劫縣當其衝知府黃瑜請于巡撫都御史葉盛奏築塼城周五百七十六丈八尺高二丈厚一丈四尺六寸串樓五百四十八間敵樓一十八座開四門東陽和西德

澤南清寧北鎮安正德十六年九月城西南隅洪水衝潰知縣蕭樟修築嘉靖十六年知縣羅愈重修萬曆十九年知縣黃應元議改蔭屋一半相錯爲陽城三十一年知縣陳一元重飾西門瀕河歲遭衝齧三十三年知縣彭名世架木疊石障之國朝康熙二十六年風雨暴作北城頽三百餘丈西城二十餘丈知縣陳欲達鳩工修復府志嘉慶十八年大雨周圍城垣及各門城樓半皆圯塌知縣吳自求詳請修葺縣志

明錢溥築城記春秋凡書城謹其時與制也蓋不時則傷農非制則違度而後世以城爲禦暴保民之所而詳記之重其功也然成周盛時穆公營謝樊侯築齊而司空城韓已具詠於詩而美之非若春秋謹其時與制而爲勞民與不臣者之戒也四會屬肇慶府地接廣西懷集密邇獠蠻居無城郭守無官軍民以爲患洪武二十三年肇慶衛指揮馮復奏調後所官軍守鎮始立木柵近以西賊猖獗延及廣東而肇慶一郡實當其衝恒被圍而受虐旣而郡守華亭黃公瑜至郡卽崇其垣墉浚其濠塹嚴柵器械以守而賊不能犯且精白一心勤於撫字由是巡撫巡按諸君子嘗以銀幣旌其賢公復

謂四會雖僻邑而懼患尤甚不可以無城乃具軍民耆舊之狀於撫院都御史崑山葉公以聞委右方伯江浦張公總其事而公則親往量程授役委府經歷吳浩衛百戶陳貴協謀以董理之天順甲申五月四日倣工越四旬而土工畢成化丁亥春而磚石之工亦畢城廣五百七十六丈高二丈二尺厚一丈四尺六寸鑿石於山砌脚高二尺陶甃於冶甃自石至垛堞該二百萬有奇采鐵力木爲屋五百四十間敵樓一十八座環蓋其城而濠遠於外深九尺濶三丈建四門有樓而名其東曰陽和西曰德澤南曰清寧北曰鎮安雄偉堅厚巋然爲邑之望軍恃之而守民賴之以安嗚呼其功豈下於成周盛時諸賢哉惜未有能詩以頌其功也公具書幣來請記余因歎夫連歲兩廣之被寇患所至殆無完郡豈爲軍失其利而亦字民者非其能耳苟得治郡如黃公者而固守之則寇雖爲患民且死守如安堵况自去冬以來今巡按都御史姑蘇韓公總理軍務一掃故習而搗其巢穴寇已無孽將使民與城相安無事而變呻吟爲詠歌安塾溺於耕鑿又察郡縣吏之賢者而舉用之非黃公其人乎黃公不日受命而去民惟覩其城則思其人思其人則頌其德於無窮矣是爲記成化三年秋九月旣望之吉

按方輿紀要四會縣城卽南綏州故城

池濶三丈深九尺歲久堙塞正德九年巡按丁楷濬之萬厯

三十三年知縣彭名世疏前濠復侵地議塞後濠工大土少
先築二基以接龍脉

吳志

新興縣

舊無城惟築土垣宋建炎四年州守王敦仁始用磚石修築
周一千二百七十八步卽古新州舊址久圯紹興二十一年
州守黃濟以城狹隘於城南一里東西北各半里徧植笏竹
環之名竹城周一千四百八十四丈開四門元至正庚寅西
寇入境焚掠知軍州事迭理迷失修葺以禦焉明洪武十三
年於竹城內增土城高八尺厚五尺周一千一百八十丈名
四門東曰朝陽西曰德勝南曰長生北曰拱辰天順七年流
賊攻陷土城知府黃瑜請都御史葉盛奏於土垣內築復磚
城六百六十一丈五尺高一丈八尺厚一丈七尺設警舖五

十五四門外各環月城改東門曰陽和西曰接勝宏治十二年僉事徐禮闢馬路廣一丈修敵樓串樓及月城嘉靖十年僉事王澄撤串樓修雉堞四十一年知縣周崑重建敵樓崇正十三年秋潦水決城七十丈知縣張復普修築 國朝順治二年建城墻子基四年知縣劉可模增建西南兩門甕城改長生門爲鎮南康熙初年知縣李雄飛李長慶重建四門城樓十三年夏大雨城坍八十餘丈知縣李超重修二十五年知縣徐煌復修三十年知縣徐斌塞南門建文明門於學宮前乾隆二年知縣裘建仍開鎮南門二十年夏四月大雨西門城樓傾圯知縣劉芳自捐廉修府志乾隆四十五年知縣洪煦修嘉慶十七年東河水漲四門崩坍知縣吳文照修續縣志

宋胡寅新州竹城記新昌郡自兩漢及齊皆縣置號曰臨允
至蕭梁氏始升爲新州廢於隋而復於唐本朝因之旣七百
年亦可謂古郡矣然有城而無郭無以考其故惟城之北曰
朝天門者斷墉翼之巋然猶存讀其記則政和中太守古公
革承詔所爲經始之績未就緒也城纔一里百有十二步耳
僅容州治列廩獄餘官廨民居悉在城外莫爲保障理不應
爾紹興二十年八桂黃濟義鄉由肇慶別駕來攝郡符值鼠
盜數十輩依山爲害官兵三討而未克坊市數驚最後受諭
出降人猶洶洶義卿於是與築之意會真拜郡乃俾推官
朱洵權令黃熙巡行四周求古遺跡相今所宜標示其處分
委兵馬監押趙公倬巡檢董元縣尉周祺各督所部丁夫夷
凹凸裨狹虛基址旣堅取野竹駢植之環袤一千二百八十
四丈再月而畢不愆於素或曰闢土爲城不易之道也恐其
未堅則有蒸而築之者矣虞其易圯則有甃而石之者矣今
也望固禦於檀欒蔽翳之間曾是以爲可乎唐大中中王式
爲安南都護始至無城池式乃立木柵塹其外而栽竹焉是
時詔蠻浸強莫能犯也孰謂竹不可恃哉凡物有同類而殊
材者斯竹也引梢如繩分枝如棘旣衆且多森如蒺藜其叢
則輻輳緻密望隔表裏及歲久而愈繁雞鶩羔豚不能道也
或者火之葉毀幹存乃益悍勁鳴呼異哉昔樊川子目于郊
園賦所見者有曰竹林外裏今十萬丈兵甲及櫓兮密陳而
環衛始以爲詞人之空言今施於實用乃如此物孰不然在
人處之且方言刺竹曰笏竹蓋領南謂刺竹云工庸告成竹
日盛長州之人歡喜晏然若有壁壘之恃咸曰後之來者與

公同志本之以德政重之以備豫申嚴戒令有培勿剪非特
甘棠一召伯之思也其為斯民之惠所覃遠矣義卿勤於職
業厚於愛民興利救弊甚眾新興戶知之若推排丁口以均
徭賦役既新子城樓觀雉堞又作南門及竹城則其最大者
也郡學正麥克等來道耆老之意恐久而無傳焉余為之記
余憂患疹疾筆力衰老不能兼載眾美稱其最大者而書之
耳云

池東臨河西南北鑿濠

吳志

長六百餘丈

郝志

廣二丈五尺深一

丈明天順七年鑿

吳志

按吳志作長七百餘丈誤

陽春縣

唐武德四年始築春州城高一丈厚六尺周圍四百二十丈
宋皇祐二年知州薛利和修元季廢壞明洪武三十一年鎮
守千戶鍾良增築高三丈厚一丈周圍五百六十七丈上建
敵樓三十座闢四門東曰迎輝西曰靖江南曰鎮南北曰仰

京天順間守備指揮李盛知縣李福海重修立城垛設弔橋
環植刺竹流賊不敢犯成化五年守備指揮祖瑄重修起蓋
樓舖八年按察使陶魯以勦捕至去雉堞爲串樓十七年知
縣邱祥修宏治八年署所百戶江淋補砌正德十年知縣黃
寬千戶童璋分修是年都指揮卜玉奉委督備地方增高四
門月城築欄馬牆內便巡邏外杜窺伺後因風雨圯壞嘉靖
三十四年知縣謝復生復改串樓爲雉堞萬厯九年知縣黃
憲清建角樓修四門易其名曰東和西靖南鎮北拱及修各
窩舖萬厯十五年八月颶風城樓窩舖盡壞知縣張文誥修
復年久廢壞崇正八年知縣王魁春修葺十五年知縣陳軾
增高城雉堞建馬路四門月城 國朝康熙九年知縣張含
瑾新建窩舖六座城樓重加修葺二十六年知縣康善述奉

部通行修飾四樓城垛六十一年在學宮前增闢一門名曰

文明門雍正八年知縣黃博厚重建窩舖八座馬路周圍數

百丈乾隆二十一年南城圯塌四丈餘二十二年西南城又

圯七十餘丈知縣姜山修復吳志乾隆四十六年知縣袁嘉德

修嘉慶十七年東西門樓傾圯知縣王鵬翥修縣志

宋薛利和春州建置記國家富有天下凡四百州分爲四等

日節度曰防禦曰團練曰刺史而春居一焉九域志粵地斗

牛分野自秦通五嶺置南海郡春爲屬部漢移隸合浦晉分

置恩州唐爲南陵郡領陽春羅水二縣版戶萬餘隋以其地

統於高涼五代多故劉氏竊據嶺表開寶初王師討平得州

四十餘以流南羅水入陽春以勤之博林入銅陵來屬數年

土人版民羅兵火亡八九合二州計戶僅登千數景德中

本道轉運使以州之古城水土惡弱遷於銅石俄又徙隸新

州越數歲復歸於舊從民便也西北陸抵京師六十有三驛

東西水湊大海總百餘里環山遶林襟巖帶峒夷獠雜居其

地土下濕宜稻梁民力穡外常優逸自足其封域所載射木

膏之異其物產不過橘柚猿狙之類凡富商大賈無因而至

其地卑且燠歲多疫四方之言瘴癘者以春爲稱首故凡補

建置城池

吏得罷必加優賞天子祀明堂歲河東薛利和來守是州新南樓以奏鼓角節動靜也修城門以謹關鑰防奸宄也重廊屋以閣勅書尊條教也葺甲庫以實兵器謹戎律也修勸農亭敦政本也造招商院恤逆旅也起舊補廢踰月告成以山川方物之名古昔廢興之蹟礱石以刊使後人守是州不須索板圖詢耆耄而有考焉皇祐二年河東薛利和撰

按此記不能分隸各門城池為建置之首爰錄於此

池宋皇祐二年鑿明洪武三十一年濬深廣各一丈周六百

九十丈成化十七年宏治八年嘉靖三十四年崇正八年各

於修城時加濬

吳志

陽江縣

陽江縣即高涼縣故城

吳志云即古南恩州誤

城邑考宋紹興

吳志作紹聖誤

始築土城

吳志云知州丁璉築

元大德間移笏山於城外以為障蔽

吳志

云種刺竹以為障蔽洪武二年改營磚城

顧祖禹讀史方輿紀要吳志云洪武三年千戶張均德甃

以磚土城高一丈五尺厚一丈周五里石城高二丈厚一丈